

Rapport da gestiun 2024 dil president dalla pleiv catolica romana s. Martin, Trun

Preziau sur Tomasz
Preziadas parochianas, preziai parochians

En miu rapport sco president dalla baselgia catolica romana S. Martin da nossa vischnaunca dundel a vus las informaziuns neccessarias sur dil passau en nies cumin-baselgia durant igl onn d'uffeci vargau.

1. General

Ina pleiv sa mo funcziunar endretg aschiditg sco ella vegn pastorada activamein. Il problem da munconza da spirituals vegnin era nus plaunsiu a sentir pli fetg. Differentas pleivs han giu uonn sur pli liung temps negin agen plevon. Nossa pleiv ha il cletg dad haver in plevon engaschau, iniziativa e cun in bien maun per ses parochians. Persuenter essan nus fetg engrazievels a nies augsegner **Sur Dr. Tomasz Piotr Drwal**.

La messa campestra era previda igl onn 2024 sigl areal da fiasta da 600 onns Ligia Grischa. Damai ch'ei ha pluviu quei di han ils responsabels stuiu anflar in' autra sligiazion ed els han celebrau la sontga Messa en caplutta da s.Onna. Tier quella messa han la giuvna Vivienne Bandli e Rico Schwarz cantau e sunau ed aschia dau a quei eveniment ina nota tut speciala. Muort la plievgia ha il cussegl pastoral lu buc organisau in gentar sco usitau. Tuttina lessel jeu engraziar fetg a tut ils gidonters per lur flexibilitad ed engaschi.

Per la fiasta da Nossadunna eis ei stau impurtont a Mathias Bundi, il niev president dil cussegl pastoral, ch'ei vegn puspei baghegiu la tribuna avon il parcadi. La sontga Messa ei vegnida celebrada dil vicari general Peter Camanzind e nies plevon sur Tomasz Piotr Drwal. La festivitad ei vegnida embellida dal chor cecilan e la musica. Era quei di havein nus giu discletg cun la plievgia. Aschia vein nus stuiu disclocar durant la sontga Messa naven dil plaz festiv en baselgia. Igl apéro vein nus priu medemamein en baselgia. Era cheu vi jeu buca tralaschar d'engraziar a tut ils gidonters che han possibilitau quella biala fiasta da Nossadunna.

Mintga 25 onns arva il Papa la Porta sontga el Dom da sogn Pieder. Cun sia avertura entscheiva mintgamai igl Onn sogn. Per era dar a nossa pleiv in segn digl Onn sogn ha sur Tomasz giu l'idea da far ina entrada speciala avon baselgia. Quell' entrada ha giu fetg buns resuns ed ei era stada pliras gadas ellas gasettas. Jeu lessel engraziar cun quella caschun alla firma Daniel Maissen per quella fetg buna lavur ed il sustegn finanziel.

Novas cazzollas en baselgia s. Martin

Alla radunonza digl onn 2023 eis ei vegniu decidiu da midar las cazzollas en baselgia s. Martin. Las cazzollas veglias eran per part donnegiadas ed ei deva buca pli tocs da scumiada. La decisiun davart tgei cazzollas ch'ins vul pender si en ina baselgia, ei semussada sco ina gronda sfida. Ensemen cun nies plevon sur Tomasz ha la suprazionza cumparegliu bia ideas d'autras baselgias. Sedecidi essan nus la fin finala per las cazzollas dil designer da products Fabio Hendry da Sedrun. El ha inventau e produciu sez las cazzollas ord in system da fildirom, puorla da celluloid reciclau e sablun. Durant ina procedura da scaldar il fildirom vegn il celluloid luaus e secoligia aschia cul sablun. Tut tenor co il fildirom vegn urschiaus e con material che vegn duvraus sa Fabio Hendry dar a ses products la fuorma giavischada. Aschia vein nus giu la caschun d'encurir ord plirs models las cazzollas per nossa baselgia. Plinavon ha Flurin Decurtins mess ensemen in concept per ils spots. Ensemen cun glied dil fatg dalla tecnica da glisch, Fabio Hendry e Flurin Decurtins han ins saviu serrar giu quei project cun grond plascher. Ei ha dau bia resuns plascheivels pertuccond quellas cazzollas. Schizun la renomada gasetta NZZ ha publicau ina fotografia da nossa baselgia e menziunau la lavur da Fabio Hendry.

Nova sfida ella baselgia s. Martin

Durant las lavurs da montar las cazzollas ha ins anflau in pli grond donn d'aua sut il tetg. Suenter ch'il donn ei vegnius inspectaus dalla firma ipz ingenieure + planer ag da Mustér ha ins viu ch'ei seresluta dabia lavur da metter en uorden il donn e che quel munta ina gronda sfida finanziaria per nossa pleiv.

a) Suprastonza

La collaboraziun denter la suprastonza ha funcziunau per mia cumpleina cuntentientscha. En 5 sedutas ei la suprastonza seradunada ed ha liquidau ils pensums adossai ad ella. Pensums delegai ad in ni l'auter per liquidaziun (art. 24 dalla constituziun) ha il responsabel sligiau e sch'igl ei stau neccessari ha la suprastonza sancziunau quella decisiun. La collaboraziun cun il cussegl pastoral e cun siu president engaschau Mathias Bundi ha funcziunau fetg bein.

Sco gia menziunau alla davosa radunonza generala vuleva igl administratur dils beins, Benedetg Albin demissionar siu post. El ei aunc staus a disposiziun entochen che nus vein giu anflau in successur. Cun plascher saiel informar vus, che Mattias Cadruvi semetta a disposiziun per il post d' administratur. Jeu sun perschadius che nus hagian anflau in fetg bien candidat per quei post cun Mathias. A Benedetg Albin lessel jeu engraziar da tut cor per si a lavur dils 10 davos onns. Igl ei stau in grond plascher da luvrar ensemen cun el. Jeu giavischel tut bien ad el egl avegnir.

b) La pastoraziun

Grazia agl engaschi da nies zun preziau plevon sur Tomasz Piotr Drwal, mo era cun igl agid da tut ils auters gremis dallas pleivs e caplanias ed en special la gronda lavur da Gabriela Vincenz sco secretaria, dil cussegl pastoral e dallas catechetas e dil catechet ha la pastoraziun era uonn funcziunau per cumpleina cuntentientscha.

c) Instrucziun religiosa

Cun Isabelle Defuns-Gammoni, Rilana Cadruvi Scherrer e Stefan Bolli havein nus il cletg da haver duas catechetas ed in catachet fetg engaschai e che vegnan apreziar fermamein dils affons e dalla pleiv.

d) Veta e mort

Mintgin ha siu agen pensum cheu sin tiara. Quel entscheiva cun la naschientscha e finescha cul viadi en la perpernadad. Veta e mort stattan datier ina a l'autra. Duront il davos onn havein nus stuiu prender cumiau da caras concristianas e da cars concristians. Nus havein denton era saviu selegrar ensemen cun ils geniturs da novs battegiar.

Davos la statistica stattan muments grevs mo era uras legrevilas.

Battens	5
Premcommunicants	5
Cresmants	10
Nozzas	1
Extrada ord la baselgia	7
Mortoris	15

A tuttas defunctas e defuncts engraziel jeu per il bien che nus havein astgau retscheiver dad els duront lur veta terrestre. Allas famiglias en malencurada esprimin nus nossa pli sincera condolientscha.

2. Engaschis en la pleiv

Enteifer la communitad crisitiana sin territori da nossa vischnaunca havein nus ina liunga roscha da fideivlas collaboraturas e collaboraturs e quei duront pli liung temps ora. Nus havein in cussegl pastoral zun activ, ugaus capluttas fideivels e cunscienzius ed ina massa autras persunas che fan el zuppau ina gronda lavur ch'ins vesa insumma buca. Menziunar lessel il cussegl pastoral, sco era la lavur dallas calustras e calusters, dils ugaus capluttas e dils organists. Medemamein lessel punctuar la lavur che vegn prestada da biars voluntariamein duront igl onn ora.

Allas persunas engaschadas lessel far in compliment per tut lur lavur per il beinstar da nossa baselgia: Lecturas, catechetas e catechets, l'organisaziun entuorn mintga sepultura, ils organists, ils chors, ils

dirigents dil chors, l'uniun da mummas e dunnas, l'uniun da giuventegna cun ornar l'intrada alla baselgia cun tschuppi e fluras, la musica instrumentala per embellir las fiastas e secapescha era tuttas persunas ch'orneschan e schubregian las baselgias.

A Clau Scherrer e nossas catechetas Isabelle Defuns e Rilana Cadruvi Scherrer lessel jeu engraziar per lur grond engaschi. Els organisieschan adina puspei occasiuns nua ch'ils affons stattan el center dil survetsch divin. Era all'uniun da mummas e dunnas engraziels per tut lur engaschi. Ellas organisieschan il solver per ils affons suenter las messas da scola, han quitaù dalla vestgadira dils premcommunicants ed il bi usit dils retgs sco era per il lavar ora tut ils sanctuaris. Senza igl engaschi dallas mummas e dunnas fuss quei tut buca pusseivel! Era allas scolastas ed ils scolasts lessel jeu engraziar per lur engaschi cun ils affons en connex cun igl usit dils retgs. Era a nossas uguas e nos ugaus caplutta s'auda ei in special engraziament, preparan els mintgmai las capluttas per il survetsch divin ed han quitaù dalla facultad da mintga caplutta. Cunquei che nus havein per la caplutta Nossadunna dalla Neiv a Schlans negin ugau, procura dunna **Renata Pfister-Maissen** voluntariamein igl usitaù quitaù dalla caplutta.

Buca emblidar d'engraziar lessel per las activitats entuorn las processions e sepulturas. A **Giusep ed Isabelle Defuns** per il riug da sepultura, allas **giuvnas** per il putar la Nossadunna mintgamai da perdanonza sco era tut quels che **portan ils cafanuns** tier mintga fiasta. Alla **suprastonza communal** deschi in cordial engraziament per putar mintga fiasta ecclesiastica il balduchin. Aschia vegnan fiastas embellidas e la veta da cuminonza viva.

A gl'entir **cussegl pastoral**, cun il zun engaschau president **Mathias Bundi**, actuara e las menadras ditgel in sincer engraziels fetg per lur bien sustegn da nies plevon. Nus havein in cussegl pastoral che s'engascha cun tutta premura per il beinstar da nossa cuminonza.

3. Petgas da nossa cardientscha

a) Ductrina

Ella scola da Trun vegn dau ductrina en tuttas classas e cheutras tschentau in bien fundament religius per ils affons. L'instrucziun religiusa ei vegnida dada: emprema tochen quarta classa dalla catecheta **Isabelle Defuns-Gamboni**. Ella s'engascha era fetg cun ils affons per ils survetschs divins per famiglias. La 5. e 6. classa vegn instruida da **Rilana Cadruvi Scherrer** che prepara medemamein l'instrucziun dalla s. Creisma. Il scalem ault vegn instruius da **Stefan M. Bolli**.

b) Fatgs da Baselgia

Tuts ils fatgs da Baselgia vegnan menziunai el rapport dil president dil cussegl pastoral.

c) Manteniment dils beins

Per gl'usitaù manteniment dils baghetgs sacrali sco era tier las casas pervendas vegn igl administratur Benedetg Albin a dar plaid e fatg. Era ad el lessel jeu engraziar grondamein per siu immens engaschi igl onn vargau.

4. Persunal

a) secreteriat: A **Gabriela Vincenz** lessel engraziar spezialmein per sia lavur fidada e cunschenziusa.

b) Lecturas e parter ora la s. communium

Allas lecturas: **Annamaria Cavigelli-Tschuor**, **Gabi Cajacob-Mirer**, **Isabelle Defuns-Gamboni**, **Esther Tomaschett-Monn** e **Rilana Cadruvi Scherrer** per Trun, **Marta Bundi-Giger**, **Josefa Wolf-Tomaschett**, **Anita Orlik-Vincenz** e **Letizia Rensch-Tomaschett** per Zignau, engraziels cordialmein per lur buns survetschs ch'ellas fan dumengia per dumengia.

c) Organists

Cun **Clau Scherrer** e **Jacinta Jacomet-Lombriser** havein nus dus organists che emballeschan mintga dumengia il survetsch divin. Engraziels fetg persuenter.

A **Claudio Vincenz** engraziein nus cordialmein per la promptadad d'embellir las s. messas cun musica sacrala en la baselgia da Zignau. Mo era als organists dil chor cecilian **Gieri Maissen e Flurin Monn** schein in sincer "Dieus paghi".

d) *CalustrAs*

Special engraziament admettel allas calustras ed als calusters: a **Gabi e Georg Cajacob-Mirer** per la baselgia parochiala, a **Letizia Rensch-Tomaschett** per la baselgia da Zignau sco era a **Tarcisi Guldemann** per la Nossadunna dalla Glisch ed ad **Angelo ed Erica Cavegn-Pfister** per la baselgia da Schlans. Senza lur gronda lavur el zuppau funcziunass nies sistem buca. Ei vegn prestau bia e buna lavur nunveseivla, mo pauc da lur lavur ei enconuschenta allas parochianas e parochians.

5. Renconuschientscha ed engraziament

Tgei fuss ina cuminonza senza la lavur da biars funcziunariAs. Quella cuminonza essas vus che separticepis alla veta religiosa en nossa pleiv e caplania cun assister allas sontgas Messas ni d'autras purschidas. Persuenter lessel admetter il duu engraziament, sperond che nossa cuminonza resti activa era el temps da desinteress per la religiun, sco era per nossa Baselia catolica romana. Nies zun premurau plevon sur Tomasz vegn sustenius digl engaschau cussegl pastoral e dallas catechetas Isabelle Defuns-Gamboni e Rilana Cadruvi Scherrer che fan in bien fundament, sin il qual nus savein baghegiar nossas activitads cristianas.

In sincer e profund engraziament ei il minimum ch'jeu sai admetter a mes consuprastonts sco era alla revisura **Lea Alig-Flury** ed al revisur **Gion Friberg**. Lea Alig-Flury demissiunescha sin la radunonza generala da quei onn. Daniev stat Denise Tomaschett-Fryberg a disposiziun per quei post. Bien engraziament.

Enten il rapport hai menziunau plirs engraziaments. Jeu sperel ch'jeu hagi emblidau negin, sche quei fuss tuttina il cass, lessel seperstgisar tier quellas persunas ed engraziar en quei mument era a lezzas.

Sco finenziun lessel engraziar a vus, preziadas parochianas e parochians, che segideis adina puspei sin ina u l'autra moda morala ni finanziala per il beinstar da nossa pleiv ni documenteis entras vossa preschientscha dumengia per dumengia vies interess per ils fatgs da nossa religiun e nossa pleiv.

Sco cuminonza sa la veta da pleiv mo exister cun il sustegn da bia mauns e sur da quels disponin nus aunc il mument. Per tut quei agid e sustegn seigi engraziau da tut cor.

Trun, avrel 2024

Pieder Decurtins, president